

Utusan Malaysia Mei 2017

Bil.	Tarikh	Tajuk Berita	Catatan	Muka Surat
1.	03 Mei 2017	Bekas kerani wanita didakwa palsukan dokumen		2
2.	04 Mei 2017	Dua didakwa terima suapan, palsukan tuntutan	SPRM	3
3.	04 Mei 2017	Pengurus besar, isteri direman	SPRM	4
4.	07 Mei 2017	Lindung sindiket judi, pelacur SPRM ada bukti penguat kuasa terima rasuah	Ketua Pesuruhjaya Suruhanjaya Pencegahan Rasuah Malaysia (SPRM), Datuk Dzulkifli Ahmad	5
5.	07 Mei 2017	Najib lancar projek naik taraf LTS RM80 juta	PERDANA Menteri, Datuk Seri Najib Tun Razak	7
6.	12 Mei 2017	Rasuah: Penganggur dipenjara enam bulan, denda RM10,000	SPRM	9
7.	13 Mei 2017	Ketua Audit Negara digesa audit industri tenaga	Presiden AWER, S. Piarapakaran	10
8.	17 Mei 2017	Rasuah Dalam Industri Binaan	Laporan Suruhanjaya Pencegahan Rasuah Malaysia (SPRM)	12
9.	20 Mei 2017	Pertumbuhan ekonomi negara dijangka kekal suku kedua		15
10.	23 Mei 2017	Pemberi Rasuah Juga Perlu Dibanteras	Suruhanjaya Pencegahan Rasuah Malaysia (SPRM)	16
11.	24 Mei 2017	DSP direman seminggu bantu siasatan	Suruhanjaya Pencegahan Rasuah Malaysia (SPRM)	18
12.	24 Mei 2015	Amaran KSN: 5,000 staf awam 'makan gaji buta' disingkir	Ketua Setiausaha Negara, Tan Sri Dr. Ali Hamsa	20
13.	25 Mei 2015	Salah laku: 15 pegawai, anggota polis ditukar serta merta	Ketua Polis Negara, Tan Sri Khalid Abu Bakar	22
14.	30 Mei 2017	SPRM: Pembantu tadbir didakwa kemukakan tujuh tuntutan palsu	Suruhanjaya Pencegahan Rasuah Malaysia (SPRM)	24
15.	31 Mei 2017	Suspek ke-13 dibebas tahanan reman	Suruhanjaya Pencegahan Rasuah Malaysia (SPRM)	25
16.	31 Mei 2017	Rasuah: Dua penguat kuasa KPDNKK Perak direman	Suruhanjaya Pencegahan Rasuah Malaysia (SPRM)	26
17.	31 Mei 2017	Penolong pengurus akhbar Inggeris direman	Suruhanjaya Pencegahan Rasuah Malaysia (SPRM)	27
18.	31 Mei 2017	Tindakan tegas akan diambil terhadap doktor salah guna profesion - Dr Hilmie		28

03 Mei 2017

1. Bekas kerani wanita didakwa palsukan dokumen

Maidzatul Ashra Mokhtar dituduh memalsukan Dokumen Pesanan Tempatan (LO) di Mahkamah Majistret Seremban, Negeri Sembilan, semalam.

RASAH 2 Mei - Seorang bekas kerani Pejabat Daerah dan Tanah Seremban mengaku tidak bersalah di dua Mahkamah Majistret di sini hari ini atas 38 pertuduhan memalsukan dokumen pesanan tempatan (LO) bagi tujuan menipu pegawai atasannya, Februari tahun lalu.

Maidzatul Ashra Mokhtar, 37, membuat pengakuan tersebut selepas pertuduhan dibacakan kepadanya di hadapan Majistret Mohd. Zaki Abd. Rahman dan Majistret Nurul Fitriza Abd. Latif.

Mengikut pertuduhan, wanita tersebut didakwa memalsukan sebanyak 38 LO bagi tujuan menipu pegawai atasannya di Pejabat Daerah dan Tanah Seremban pada 19 Februari 2016.

Pertuduhan terhadapnya dikemukakan mengikut Seksyen 468 Kanun Keseksaan yang memperuntukkan hukuman penjara sehingga tujuh tahun dan denda jika sabit kesalahan.

Pendakwaan dikendalikan oleh Timbalan-timbalan Pendakwa Raya, Sara Afiqah Zulkipli dan Mohamad Azriff Firdaus Mohamad Ali manakala tertuduh diwakili peguam Nolian Ali Othman.

Tertuduh yang kini merupakan peniaga kecil-kecilan dibenarkan bebas dengan jaminan berjumlah RM61,000 berserta seorang penjamin bagi kesemua pertuduhan sementara menunggu sebutan semula kes pada 30 Mei ini.

Wanita yang mempunyai empat orang anak itu membayar wang jaminan tersebut.

04 Mei 2017

2. Dua didakwa terima suapan, palsukan tuntutan

KUALA LUMPUR 4 Mei - Seorang pengarah dan pengurus sebuah syarikat kontraktor dihadapkan ke Mahkamah Sesyen di sini hari ini atas 18 pertuduhan menerima suapan dan satu pertuduhan mengemukakan tuntutan palsu berhubung projek pemasangan paip gas Petronas melibatkan jumlah lebih RM8 juta, enam tahun lalu.

Tan tian Hock, 61, dan Lim Oii Hwa, 48, mengaku tidak bersalah selepas kesemua pertuduhan terhadap mereka selesai dibacakan di hadapan tiga hakim.

Tian Hock yang merupakan pengarah syarikat Algotech (M) Sdn. Bhd. didakwa atas tiga pertuduhan menerima suapan daripada empat individu melibatkan jumlah RM330,000.

Ooi Hwa yang merupakan pengurus projek syarikat itu pula berdepan 15 pertuduhan menerima suapan daripada enam individu melibatkan jumlah RM1.08 juta.

Mereka juga didakwa secara bersama-sama telah memalsukan tuntutan pelaksanaan kerja melibatkan jumlah RM7 juta yang tidak pernah dilaksanakan.

Mereka didakwa mengikut Seksyen 16(a)(A) dan Seksyen 18 Akta Suruhanjaya Pencegahan Rasuah Malaysia 2009. -

04 Mei 2017

3. Pengurus besar, isteri direman

Seorang Pengurus Besar sebuah anak syarikat milik Prasarana dan isterinya diiring oleh Pegawai Suruhanjaya Pencegahan Rasuah Malaysia (SPRM) bagi memohon perintah tahanan reman berhubung kes menyalahgunakan kedudukannya dan mengambil wang rasuah untuk kepentingan peribadi di Mahkamah Majistret Putrajaya di sini, hari ini

PUTRAJAYA 4 Mei - Pengurus Besar sebuah anak syarikat Prasarana, Project Technical Support Rapid Cheras Selatan dan isterinya direman lima hari bagi membantu siasatan berhubung kes penyalahgunaan kedudukan dan menerima rasuah.

Perintah reman itu dikeluarkan oleh Mahkamah Majistret di sini hari ini selepas membenarkan permohonan Suruhanjaya Pencegahan Rasuah Malaysia (SPRM).

Majistret Nik Isfahanie Tasnim Wan Ab. Rahman memerintahkan mereka direman bermula hari ini hingga 8 Mei ini bagi membolehkan siasatan dijalankan.

Kes tersebut disiasat mengikut seksyen 17 (a) ASPRM 2009 yang boleh dihukum di bawah Seksyen 24 akta sama yang memperuntukkan hukuman penjara sehingga 20 tahun dan denda sehingga lima kali ganda nilai suapan atau RM10,000 mengikut mana lebih tinggi.

4. Lindung sindiket judi, pelacur

SPRM ada bukti penguat kuasa terima rasuah



DZULKIFLI AHMAD (tengah) bersama mahasiswa yang hadir dalam Seminar Graduan Holistik 2017 di Langkawi, Kedah semalam. Yang turut hadir, Naib Canselor Unimap, Prof. Datuk Dr. Zul Azhar Zahid Jamal (empat dari kiri)

LANGKAWI 6 Mei - Ketua Pesuruhjaya Suruhanjaya Pencegahan Rasuah Malaysia (SPRM), Datuk Dzulkifli Ahmad mendedahkan pihaknya mempunyai bukti terdapat penguat kuasa di negeri di selatan tanah air melindungi sindiket judi dan pelacuran dengan bayaran RM1.2 juta sebulan.

Menurutnya, bukti berbentuk dokumen itu ditemukan pihaknya ketika melakukan operasi negeri tersebut baru-baru ini.

Dalam pada itu katanya, SPM mempunyai maklumat terdapat tiga sindiket di ibu negara yang memperuntukkan RM5 juta sebulan kepada penguat kuasa untuk melindungi kegiatan haram mereka.

Beliau bagaimanapun enggan mendedahkan lebih lanjut mengenai kedua-dua kes tersebut.

"Kita tidak mahu mengganggu siasatan, namun kita bercakap berdasarkan dokumen yang kita jumpa.

"Kita tak cakap tanpa apa-apa bukti. Apa yang boleh dikatakan, kedua-dua kes ini adalah berbeza. Namun, penemuan siasatan ini amat membimbangkan. Ini berdasarkan jumlah (wang rasuah) terlibat amat besar," katanya ketika berucap dalam majlis perasmian Seminar Graduan Holistik 2017 di sini hari ini.

Seramai 500 mahasiswa mewakili 17 universiti awam dari seluruh negara menghadiri seminar anjuran Universiti Malaysia Perlis (Unimap) dengan kerjasama SPRM itu.

Dzulkifli memberitahu, negara ketika ini mempunyai masalah kerana walaupun mempunyai penguat kuasa yang menjaga sempadan tetapi tetap bolos dengan kemasukan senjata, dadah dan berlakunya kegiatan judi haram.

"Ini berlaku di merata-rata tempat kerana adanya rasuah. Penguat kuasa yang sepatutnya diamanahkan membanteras menjadi sebaliknya. Inilah realitinya," katanya.

Ketika ditanya adakah kedua-dua kes tersebut melibatkan pegawai penguat kuasa di peringkat atasan, Dzulkifli memberitahu, pihaknya turut menyiasat perkara itu.

5. Najib lancar projek naik taraf LTS RM80 juta

2

PERDANA Menteri, Datuk Seri Najib Tun Razak bersama Menteri Pengangkutan, Datuk Seri Liow Tiong Lai dan Ketua Menteri Sabah, Datuk Seri Musa Aman hadir pada Majlis Perasmian Bangunan Terminal Baharu dan pelancaran Projek naik taraf landasan lapangan terbang Sandakan hari ini.

SANDAKAN 7 Mei - Datuk Seri Najib Tun Razak bertekad mahu mengembalikan zaman kegemilangan ekonomi di bandar ini setaraf dengan era tahun 1980-an dan 1990-an yang ketika itu dipacu oleh industri pembalakan.

Sebagai permulaan, Perdana Menteri hari ini melancarkan bangunan terminal baharu dan projek menaik taraf landasan Lapangan Terbang Sandakan (LTS) untuk memperbanyakkan lagi penerbangan antarabangsa terus ke daerah itu.

Najib berkata, projek dengan kos siling RM80 juta itu akan menjana ekonomi Sandakan melalui sektor ekopelancongan, perhotelan dan jualan produk tempatan.

"Saya lihat Sandakan memerlukan pertolongan Persekutuan. Sandakan telah melalui era kegemilangannya semasa zaman balak dulu sehingga digelar 'the timber boom' dan Paris of the East.

"Saya lihat sekarang Sandakan sangat berpotensi jadi saya mendengar denyut nadi rakyat, projek ini akan menarik kemasukan pelancong terus dari Korea dan China, maka ekopelancongan maju, ada pelancong beli barang jualan," katanya ketika berucap melancarkan projek itu di LTS hari ini.

Yang turut hadir, Ketua Menteri, Datuk Seri Musa Aman dan Menteri Pengangkutan, Datuk Seri Liow Tiong Lai.

Najib berkata, projek tersebut merupakan hadiah kepada rakyat Sabah khususnya Sandakan yang tidak disenaraikan dalam Rancangan Malaysia Ke-11 (RMK11), namun beliau telah mengarahkan Kementerian Pengangkutan dan Unit Perancang Ekonomi memberi kelulusan segera.

"Saya juga mahu projek ini dibuat secara pakej iaitu sistem radar yang digunakan mesti turut dinaik taraf, kontraktor sudah dilantik pastikan mula projek bulan Jun jangan tunggu akhir tahun.

"Alangkah baik selepas landasan dipanjangkan kerana jet yang lebih besar boleh turun dari China, Korea, Jepun dan lain-lain," tegas beliau.

12 Mei 2017

6. Rasuah: Penganggur dipenjara enam bulan, denda RM10,000

MOHAMAD Daud Abdullah (tengah) diiringi dua pegawai SPRM untuk didakwa di Mahkamah Sesyen Seremban, Negeri Sembilan hari ini.

RASAH 12 Mei - Mahkamah Sesyen Seremban di sini hari ini menjatuhkan hukuman penjara enam bulan dan denda RM10,000 terhadap seorang penganggur yang memberi rasuah sebanyak RM101 kepada konstabel sukarelawan polis tahun lalu.

Tertuduh, Mohamad Daud Abdullah, 53, membuat pengakuan itu sebaik pertuduhan ke atasnya dibacakan oleh jurubahasa di hadapan Hakim Fathiyah Idris.

Berdasarkan pertuduhan, tertuduh didakwa cuba memberi suapan wang tunai RM101 kepada konstabel sukarelawan polis, Peh Chee Chong sebagai dorongan tidak mengambil tindakan kerana melakukan perbuatan tidak senonoh di tempat awam.

Kesalahan itu dilakukan kira-kira pukul 11.20 malam di Pejabat Sukarelawan Polis di Jalan S2 G2 di Garden Avenue dekat sini pada 9 Jun 2016.

Sabit kesalahan, lelaki terbabit yang merupakan penganggur boleh dikenakan hukuman penjara sehingga 20 tahun dan denda maksimum lima kali ganda nilai suapan.

Pegawai Pendakwa Suruhanjaya Pencegahan Rasuah Malaysia (SPRM), Karmila Mokhtar mengemukakan pendakwaan mengikut Seksyen 17(b) Akta SPRM 2009.

7. Ketua Audit Negara digesa audit industri tenaga

KUALA LUMPUR 12 Mei - Persatuan Penyelidikan Air dan Tenaga Malaysia (AWER) mendakwa wujud kecenderungan projek-projek dianugerahkan kepada syarikat yang tiada pengalaman dan meletakkan harga bidaan lebih tinggi.



S. Piarapakaran

Presiden AWER, S. Piarapakaran mendakwa, syarikat-syarikat sebegini adalah seperti dummy company yang akhirnya akan menjual hak pembinaan (development rights) bagi meraih keuntungan atas angin, sambil memegang saham dalam projek tersebut supaya tidak mengundang keraguan.

Menurut beliau, 'jual-beli' sebegini adalah kos tambahan kepada rakyat dan ia jelas kelihatan dalam beberapa kes berkaitan penganugerahan hak pembinaan dengan 'alasan-alasan yang pelik' melalui rundingan terus sejak kebelakangan ini.

Katanya, pembidaan kompetitif adalah untuk memastikan harga bidaan terendah daripada pembida yang mempunyai pengalaman dalam teknologi atau bidang tertentu dipilih dan melalui cara ini, kerajaan dapat memastikan hanya kos terendah disalurkan kepada pengguna.

"Dalam kes LSS, kerajaan telah pun menggariskan pembidaan kompetitif sebagai kaedah penganugerahan bagi projek-projek loji janakuasa dalam kedua-dua Rancangan Malaysia Ke-10 dan Ke-11.

"Kaedah penganugerahan projek sepatutnya tidak bertentangan dengan keputusan dan dasar kerajaan," katanya sebagai mengulas laporan Utusan Malaysia hari ini yang memetik sumber industri berhubung kaedah penganugerahan kontrak pembangunan Loji Solar Fotovoltaik Berskala Besar (LSS).

Menurut sumber industri, keputusan Suruhanjaya Tenaga (ST) menjadi tanda-tanya kerana mengeluarkan kontrak tidak mengikut syarat yang ST sendiri tetapkan.

Beberapa syarikat yang turut serta dalam program pembidaan LSS baru-baru ini, mendakwa sekurang-kurangnya dua syarikat diluluskan oleh ST pada harga rujukan (reference price) 41 sen per kWh dan satu melebihi harga tersebut.

Dalam konteks ini, Piarapakaran menyeru Ketua Audit Negara untuk mengaudit isu-isu yang menghantui industri tenaga negara.

"Melalui audit terperinci, kita akan dapat mengenal pasti sekiranya wujud Little Napoleons di peringkat kementerian dan suruhanjaya yang melanggar dasar-dasar negara. Tindakan mereka tidak mematuhi prosedur akan mengakibatkan rakyat menanggung kos yang lebih," ujar beliau.

8. Rasuah Dalam Industri Binaan



SEBELUM pembangunan harta tanah melibatkan saiz tanah luas dan cadangan pembinaan binaan yang banyak dijalankan, proses dan prosedur perancangan dan pembangunan perlu diselesaikan.

TERPAMPANG di dada akhbar mengenai pegawai kerajaan ditangkap rasuah. Nilai suapan jutaan ringgit. Berbagai-bagi kereta mewah disita. Tidak kurang rumah mewah bernilai jutaan ringgit disita. Wang tunai berjuta-juta ringgit dirampas dan banyak akaun bank yang dibekukan. Beratus-ratus beg tangan berjenama dirampas. Begitulah kegiatan rasuah yang berleluasa di negara kita sejak akhir-akhir ini.

Laporan Suruhanjaya Pencegahan Rasuah Malaysia (SPRM) menunjukkan setakat Januari 2017 terdapat 58 kes tangkapan yang dibuat di seluruh negara manakala pada 2016 sejumlah 939 tangkapan dilakukan berbanding 2015 sebanyak 841. Tahniah kepada SPM yang begitu agresif membasmi kegiatan rasuah. Sesungguhnya rasuah sangat berbahaya kerana ia ibarat anai-anai yang memakan pokok hingga ke akar tunjangnya. Akhirnya, pokok akan tumbang menyembah bumi. Negara akan hancur.

Kegiatan rasuah kebanyakannya sering membabitkan industri perumahan negara. Kenapa rasuah berlaku dalam industri perumahan? Seorang pengkaji harta tanah dari Universiti Paisley, Scotland, United Kingdom, Profesor Millington mengatakan bahawa salah satu ciri-ciri harta tanah adalah modal (nilai) yang cukup besar. Tiada projek perumahan dan pembinaan yang bernilai rendah. Sesebuah projek pembinaan rumah melibatkan saiz tanah yang luas. Adakalanya hingga beratus-ratus hektar.

Dengan bilangan unit rumah yang beribu-ribu unit, nilai pembangunan kasar (NPK) juga jutaan ringgit. Bagi sesebuah taman perumahan yang luas boleh dijadikan sebuah bandar baharu, bilangan unit rumah boleh mencapai sehingga 20,000 unit. Pelbagai bentuk dan jenis rumah termasuklah rumah

banglo mewah dengan nilai mencecah lebih RM1 juta, rumah berbandung dengan nilai melebihi RM500,000 dan rumah teres, rumah mampu milik dan kemudahan-kemudahan lain seperti sekolah, padang permainan dan sebagainya apabila dikira semuanya, kos pembangunan mencecah berbilion ringgit.

Sebelum pembangunan hartanah yang melibatkan saiz tanah yang luas dan cadangan pembinaan binaan yang banyak dijalankan, proses dan prosedur perancangan dan pembangunan perlu diselesaikan. Pemaju perlu mematuhi semua prosedur pembangunan di bawah peruntukan Akta Perancangan Bandar dan Desa 1976 (Akta 172). Kelulusan perancangan perlu diperoleh daripada agensi-agensi berkaitan seperti pihak Berkuasa Perancang Bandar Tempatan, pihak berkuasa tempatan (PBT) dan kerajaan negeri.

Begitu juga peraturan di bawah Kanun Tanah Negara 1965. Pemaju perlu mematuhi syarat-syarat guna tanah seperti menukar kegunaan pertanian kepada bangunan, cantuman tanah, pecah-bahagi dan sebagainya supaya pembinaan boleh dijalankan. Sama juga dengan laluan di bawah peruntukan Seksyen 282-291 Kanun Tanah Negara 1965. Peruntukan di bawah Undang-undang Kecil Bangunan Seragam 1984 juga perlu dipenuhi. Oleh kerana proses dalam pembangunan tanah panjang, adakalanya mengelirukan, maka ada pemain yang kurang sabar dan mengambil kesempatan untuk melakukan rasuah. Apabila sekali cuba sudah berjaya, mereka teruja untuk melakukannya lagi. Akhirnya, perbuatan rasuah menjadi satu wabak yang berleluasa.

Cadman Austin-Crowe dalam bukunya *Property development* mengatakan bahawa proses pembangunan hartanah melibatkan ruang yang luas dan ramai pemain. Apabila proses pembangunan hartanah melibatkan pelbagai agensi dan pemain, peluang untuk berinteraksi terbuka luas. Justeru, peluang untuk melakukan penyelewengan dan rasuah juga terbuka kepada semua pihak bagi melicinkan proses berkaitan.

Misalnya, apabila proses untuk carian hakmilik di pejabat tanah dan galian mengambil masa yang panjang, rasuah boleh dijadikan alat untuk mempercepatkannya. Lantaran, pemain yang tidak profesional dan kurang sabar akan terjebak dengan suapan.

Kita sering mendengar rungutan rakyat bahawa harga rumah mampu milik melampaui jangkauan mereka untuk membelinya. Kenapakah perkara ini terjadi? Harga rumah di pasaran ditentukan apabila berlaku keseimbangan penawaran dan permintaan. Sebenarnya, titik keseimbangan sukar dicapai. Sentiasa ada faktor dalaman dan luaran yang mengganggu gugat situasi keseimbangan berkenaan. Faktor kewangan sentiasa dipantau kerajaan. Pemaju sering menaikkan harga rumah walaupun tiada punca yang mempengaruhinya. Pihak kerajaan seringkali menggubal dan meminda undang-undang perumahan. Begitu juga dengan harga bahan-bahan binaan di pasaran yang sentiasa meningkat naik disebabkan inflasi.

Jadi, apabila berlaku suapan daripada pemaju kepada agensi kerajaan yang memberi kelulusan pembangunan, nilai suapan akan ditambah dengan menaikkan harga rumah. Pada hakikatnya, pemaju

tidak menanggung apa-apa kerugian kerana kos suapan dimasukkan sebagai sebahagian daripada harga rumah yang dibayar pembeli akhir. Akibatnya, harga rumah melambung naik.

Selain persepsi neoklasikal tadi, sikap manusia dijadikan taruhan. Sikap penentu segalanya. Pembangunan harta tanah melibatkan pelbagai pihak dengan motif, strategi dan tindakan yang berbagai-bagai. Pembangunan membawa peningkatan nilai harta tanah. Nilai yang terkunci perlu dibuka dan ditingkatkan. Nilai yang dimaksudkan di sini bukan semata-mata nilai ekonomi tetapi juga nilai budaya yang ada pada tanah yang hendak dibangunkan. Namun, pada hakikatnya, banyak perkara yang menentukan sikap kita terhadap permintaan dan penawaran di pasaran. Apabila berlaku rasuah dalam industri binaan, harga rumah meningkat di pasaran.

Atas dasar kesedaran betapa pentingnya memahami punca rasuah dan implikasinya, semua pihak yang terlibat dalam industri pembinaan perlu menjalankan daya usaha membantu membanteras rasuah hingga ke akar umbi.

PROFESOR DR. ISMAIL OMAR ialah Presiden Pertubuhan Profesional Tanah Malaysia (Pertama) dan pensyarah Universiti Tun Hussein Onn Malaysia.

20 Mei 2017

9. Pertumbuhan ekonomi negara dijangka kekal suku kedua

KUALA LUMPUR 19 Mei - Pertumbuhan ekonomi negara pada kadar 5.6 peratus pada suku pertama tahun ini disifatkan sebagai sangat bagus dan dijangka mampu dikekalkan bagi suku kedua berdasarkan persekitaran semasa.

Pandangan itu disuarakan oleh Pengarah Eksekutif Institut Kajian Ekonomi Malaysia (MIER), Dr. Zakaria Abdul Rashid yang menjelaskan sememangnya Bank Negara Malaysia (BNM) mengunjurkan pertumbuhan yang lebih baik tahun ini tetapi perkembangan ditunjukkan bagi suku pertama amat memberangsangkan.

"Soalnya sama ada kita mampu mengekalkan pertumbuhan ini untuk suku tahun seterusnya sehingga penghujung 2017 atau tidak? Kalau kita lihat Indeks Persekitaran Perniagaan (BCI) daripada aktiviti dalaman dan luar negeri, ada tanda 2017 lebih baik berbanding 2016, khususnya daripada aspek luar negeri.

"Ini juga disyorkan oleh Bank Dunia dan Dana Kewangan Antarabangsa (IMF). Dengan persekitaran ekonomi yang bertambah baik, untuk kekalkan kadar pertumbuhan itu bagi suku kedua tidak mustahil, kalau turun pun sedikit sahaja," katanya ketika dihubungi di sini hari ini.

Beliau berkata demikian ketika diminta mengulas mengenai pertumbuhan ekonomi Malaysia sebanyak 5.6 peratus pada suku pertama 2017 disokong oleh permintaan dalam negeri yang bertambah kukuh, khususnya perbelanjaan sektor swasta.

Untuk rekod, pertumbuhan ekonomi negara pada suku sama tahun lalu adalah pada kadar 4.5 peratus.

Dalam pada itu, Presiden Gabungan Dewan Perniagaan dan Perindustrian India (MAICCI), Tan Sri K. Kenneth Eswaran memberitahu, pertumbuhan memberangsangkan itu didorong oleh pelbagai program transformasi kerajaan di bawah pimpinan Perdana Menteri, Datuk Seri Najib Tun Razak selain mempromosikan ekonomi negara ke peringkat antarabangsa.

10. Pemberi Rasuah Juga Perlu Dibanteras

SELEPAS SPRM menangkap beberapa pegawai polis di Melaka, banyak pusat judi dan rumah urut di Banda Hilir ditutup.

ISU rasuah melibatkan penangkapan enam pegawai Polis Diraja Malaysia (PDRM) di negeri ini oleh Suruhanjaya Pencegahan Rasuah Malaysia (SPRM) kerana melindungi premis judi haram dan pusat urut di sekitar Melaka hangat diperkatakan bukan sahaja oleh penduduk negeri ini malah di seluruh negara.

Ramai terkejut apabila dua pegawai polis bertaraf Ketua Polis Daerah (OCPD) ditahan bagi membantu siasatan kerana dipercayai menjadi dalang dalam kegiatan itu sehingga menyukarkan usaha polis untuk mengekang kegiatan haram tersebut.

Malah ramai yang tidak percaya bagaimana seorang anggota polis berpangkat koperal mampu memiliki wang tunai berjumlah RM800,000 dan disimpan di dalam stor rumahnya dipercayai hasil aktiviti haram tersebut.

Seorang pekerja stor yang bekerja di Negeri Sembilan tetapi menetap di Krubong, Melaka memberitahu penulis ketika bertemu di sebuah kedai kopi di Seremban baru-baru ini, katanya sebelum ini memang kegiatan judi dan pusat urut begitu banyak khususnya di sekitar Melaka Tengah iaitu Banda Hilir malah dia pernah sesekali 'mengintai' kawasan berkenaan.

Namun, katanya, selepas membaca akhbar berita penangkapan pegawai polis di Melaka, banyak pusat judi di Banda Hilir tutup begitu juga rumah-rumah urut tetapi penulis tidak sempat bertanya adakah dia turut mengintai atau menyertai aktiviti di rumah urut itu sebelum ini.

"Mungkin bila pegawai polis yang selama ini memberi perlindungan kepada kegiatan ini ditahan, sebab itulah mereka tidak lagi beroperasi.

"Memang banyak yang dibuka sebelum ini. Bagus juga bila ada serbuan SPRM, baru mereka tidak lagi beroperasi," kata lelaki berusia lingkungan 50-an itu yang turut terkejut dengan tindakan besar-besaran SPRM menangani kegiatan salah laku di negerinya.

Tidak adil jika pegawai polis berkenaan dipersalahkan bulat-bulat kerana ketika ini siasatan masih dijalankan oleh SPRM, malah rakan penulis dari sebuah akhbar berbahasa Inggeris menulis satu berita mengenai dua pegawai polis berkenaan yang disifatkan sebagai individu yang baik, mudah didampingi dan mesra dengan semua penduduk kawasan pentadbiran mereka.

Juga bukan bermaksud penulis menyebelahi sesiapa kerana tindakan diambil SPRM itu adalah berdasarkan kepada maklumat serta intipan dan hasil risikan dalam usaha memerangi kegiatan rasuah sehingga menyebabkan imej PDRM akan tercemar sekiranya betul mereka memiliki pegawai atasan yang korup, maka rasuah dan menyalahgunakan kuasa untuk melindungi kegiatan tidak bermoral.

Tetapi sesuatu terlintas di fikiran penulis iaitu jika mereka yang dipercayai mengambil rasuah itu ditangkap, bagaimana pula dengan pemberi rasuah yang selama ini sentiasa memberi wang sogokan kepada seseorang individu itu untuk melindungi kegiatan mereka.

Bayangkan wang tunai RM800,000 boleh dimiliki seorang anggota polis berpangkat koperal, sudah pasti ada tokan besar yang membayarinya, sejak sekian lama.

Agak-agak berapakah yang diterima oleh anggota pasukan penguat kuasa itu sehingga dikumpulkan begitu banyak dan mampu membeli sebuah rumah teres dua tingkat di Seremban dan sebuah kereta mewah secara tunai?

Terima kasih kepada SPRM kerana bertindak habis-habisan memerangi kegiatan ini tetapi adakah jenayah kolar putih itu akan terhenti dengan penangkapan pegawai-pegawai polis yang disyaki terlibat ini?

Jika PDRM mengumumkan bakal melakukan rombakan besar-besaran bagi mengekang masalah integriti agar tidak terus menular dalam kalangan anggota dan pegawainya pada masa hadapan, adakah pegawai yang mengambil alih tugas tersebut tidak akan 'rambang mata' dengan wang tunai sebanyak itu pada masa depan?

Kita mahu bukan setakat tangkap mereka yang mengambil rasuah, malah pemberi rasuah juga perlu diburu dan dihadapkan ke muka pengadilan kerana selagi mereka ini tidak didakwa, kegiatan rasuah itu sukar untuk dibendung. Pegawai polis boleh silih berganti tetapi pemberi rasuah akan tetap menawarkan ganjaran supaya kesalahan mereka dilindungi.

24 Mei 2017

11. DSP direman seminggu bantu siasatan

Ketua Bahagian Siasatan Jenayah IPD Melaka Tengah dibawa ke Mahkamah Majistret Putrajaya di Putrajaya, semalam.

PUTRAJAYA 23 Mei – Ketua Bahagian Siasatan Jenayah Ibu Pejabat Polis Daerah (IPD) Melaka Tengah merupakan individu terbaharu yang ditahan bagi membantu kes kutipan rasuah melindungi operasi pusat judi haram dan rumah urut di sekitar Melaka.

Mahkamah Majistret di sini memerintahkan pegawai kanan ber pangkat Deputi Superintenden (DSP) itu direman seminggu berkuatkuasa hari ini.

Perintah tahanan reman mengikut Seksyen 117 Kanun Tatacara Jenayah itu dikeluarkan oleh Majistret Nik Isfahanie Tasnim Wan Ab. Rahman selepas membenarkan permohonan Suruhanjaya Pencegahan Rasuah Malaysia (SPRM).

Beliau yang ditahan di pejabatnya kira-kira pukul 12.30 tengah hari semalam, disiasat berhubung kes berkenaan mengikut Seksyen 16 (a)(B) dan 17(a) Akta SPRM 2009.

Pegawai berusia 49 tahun itu yang berpakaian baju lokap berwarna jingga dan tangan bergari tiba di mahkamah pada pukul 9.10 pagi dengan menaiki kenderaan SPRM.

Suspek adalah individu kelapan melibatkan anggota dan pegawai polis yang ditahan oleh SPRM dalam beberapa siri tangkapan berhubung kes berkenaan.

Dua ketua polis daerah, masing-masing berusia 54 tahun dan 46 tahun turut direman enam hari bermula 7 Mei lalu.

Tahanan reman yang berakhir semalam dilanjutkan selama lima hari lagi sehingga 27 Mei ini.

Siasatan dijalankan mengikut Seksyen 16 (a)(B) dan 17(a) Akta SPRM 2009 dan Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001.

Difahamkan, SPRM menemui wang tunai berjumlah lebih RM186,000 dan wang dalam akaun melebihi RM459,000 milik beberapa individu yang ditahan dipercayai disalurkan oleh tauke-tauke judi haram.

Pegawai-pegawai polis terlibat dipercayai meminta wang rasuah daripada pengusaha pusat judi dan rumah urut di sekitar Melaka selain mereka membayar wang perlindungan manakala orang awam bertindak sebagai perantara bagi melicinkan proses pengutipan wang.

24 Mei 2015

12. Amaran KSN: 5,000 staf awam 'makan gaji buta' disingkir

KUALA LUMPUR 23 Mei - Kira-kira 5,000 kakitangan awam berjawatan tetap yang 'makan gaji buta' kini berada dalam radar Jabatan Perkhidmatan Awam (JPA) untuk ditamatkan perkhidmatan jika tidak berubah selepas diberi tempoh enam bulan

Kumpulan itu dikenal pasti terpalit dengan pelbagai masalah disiplin antaranya ponteng kerja selama 200 hari dalam setahun, datang lewat ke pejabat, terlibat dengan perniagaan serta hilang fokus sehingga penilaian prestasi mereka berada di bawah 60 peratus.

Ketua Setiausaha Negara, Tan Sri Dr. Ali Hamsa ketika mengesahkan perkara itu berkata, tindakan tegas tersebut perlu diambil selari dengan pelan transformasi perkhidmatan awam kerana tidak adil untuk jabatan terus mengekalkan mereka yang hanya 'makan gaji buta'.

Bagaimanapun katanya, sebelum ditamatkan perkhidmatan, kumpulan kakitangan awam yang bermasalah tersebut akan diberi peluang untuk memperbaiki prestasi kerja masing-masing dalam tempoh enam bulan terlebih dahulu sebelum penyingkiran dibuat jika masih tidak berubah.

"Kita bukan hina penjawat awam, ini untuk kebaikan penjawat awam tersebut dan juga jabatan. Mereka tak fokus, terlibat dengan perniagaan, ponteng kerja dan macam-macam lagi. Orang macam ini saya rasa kita tidak perlu pertahankan untuk kita bayar gaji buta.

"Jumlah 5,000 bukan angka mengejutkan kerana keseluruhan penjawat awam 1.61 juta tetapi kita akan panggil mereka untuk diberi latihan. Tapi kalau mereka masih tak mahu tolong diri sendiri kita tak dapat berbuat apa," katanya.

Beliau berkata demikian dalam sidang akhbar selepas perasmian Hari Terbuka Strategi Lautan Biru Kebangsaan (NBOS) oleh Perdana Menteri, Datuk Seri Najib Tun Razak di Pusat Konvensyen Kuala Lumpur di sini hari ini.

Ali berkata demikian ketika diminta mengulas dasar pemisah personal berprestasi rendah bagi penjawat awam yang diumumkan Perdana Menteri semasa pembentangan Rancangan Malaysia Ke-11 (RMK-11) dalam usaha mentransformasi perkhidmatan awam.

Kepada soalan apa reaksi Kongres Kesatuan Pekerja-Pekerja Dalam Perkhidmatan Awam (CUEPACS) berhubung langkah tersebut, beliau berkata, sesi perbincangan mengenai perkara itu sudah dilakukan sebelum ini dan kesatuan tersebut melahirkan persetujuan.

Beliau dalam nada yang tegas juga menjelaskan, tindakan yang akan diambil ke atas kakitangan awam bermasalah itu bukan bertujuan mengecilkan saiz tenaga kerja sektor awam kerana pengambilan baharu tidak akan dibekukan bagi menggantikan mereka yang bersara.

"Kita memberi jaminan tiada langkah mengecilkan saiz tenaga kerja sektor awam kerana pengambilan baharu akan tetap dibuat bagi menggantikan kakitangan yang bersara berjumlah 25,000 setahun, cuma perjawatan baharu sahaja yang dibekukan," katanya.

25 Mei 2015

13. Salah laku: 15 pegawai, anggota polis ditukar serta merta

KHALID ABU BAKAR bersama Pengarah Pusat Darah Negara, Dr. Noryati Abu Amin (tiga dari kiri) beramah mesra dengan anggota polis yang terlibat dalam program derma darah sempena Peringatan Hari Polis Ke-210 di Kuala Lumpur, semalam.

KUALA LUMPUR 24 Mei - Polis Diraja Malaysia (PDRM) mengesahkan rombakan pertama menerusi pertukaran 15 pegawai termasuk anggota membabitkan kontinjen Melaka kerana dipercayai terlibat salah guna kuasa.

Ketua Polis Negara, Tan Sri Khalid Abu Bakar berkata, arahan pertukaran itu dilakukan serta merta selepas beberapa pegawai termasuk anggota terbabit ditahan SPRM di Melaka baru-baru ini.

"Saya sendiri akan melawat kontinjen tersebut Jumaat ini untuk bertemu dengan pegawai dan anggota di sana bagi mendengar dan membincangkan masalah ini.

"Selain itu, rombakan fasa kedua juga akan dilakukan dalam masa terdekat ini terhadap semua pegawai dan anggota yang tidak menjalankan tugas dengan betul," katanya dalam sidang akhbar selepas merasmikan Program Derma Darah Sempena Peringatan Hari Polis Ke-210 Tahun 2017 di Bukit Aman di sini hari ini.

Tegas Khalid lagi, PDRM memandang serius mengenai isu integriti, malah tidak akan berkompromi dengan anggota maupun pegawai yang melakukan kesalahan berkenaan.

"Siasatan dalaman turut dilakukan Jabatan Integriti dan Pematuhan Standard terhadap 21 anggota membabitkan Jabatan Siasatan Jenayah Narkotik (JSJN) dan jabatan lain di Bukit Aman.

"Saya pandang serius perkara ini dan memberi amaran kepada mana-mana anggota supaya jalankan tugas dengan telus bagi mengelakkan mereka berdepan dengan tindakan," ujarnya.

Sehingga hari ini, lapan pegawai dan seorang anggota polis termasuk ketua polis daerah ditahan SPRM dalam beberapa siri tangkapan kerana dipercayai meminta wang rasuah daripada pengusaha pusat judi dan rumah urut di sekitar Melaka.

Difahamkan, dua ketua polis daerah berkenaan masing-masing akan ditukar ke Bukit Aman dan Klang Selatan.

Turut terlibat adalah tujuh pegawai daripada Ibu pejabat Polis Kontinjen (IPK) Melaka termasuk Timbalan Ketua Jabatan Siasatan Jenayah (JSJ) dan Pegawai Bahagian Perjudian, Maksiat dan Kongsi Gelap (D7) serta seorang pegawai dari IPD Melaka Tengah yang akan berpindah ke Bukit Aman.

Di samping itu, sebanyak 21 anggota dan pegawai daripada JSJN ditahan kerana dipercayai terlibat melindungi kumpulan samseng.

30 Mei 2017

14. SPRM: Pembantu tadbir didakwa kemukakan tujuh tuntutan palsu

Pembantu Tadbir Kementerian Pertahanan Malaysia, Siti Nor Hakiki Abdullah (berkerusi roda) didakwa di Mahkamah Sesyen Kuala Lumpur atas pertuduhan memperdaya seorang pegawai tadbir, Siti Kartika Sari Mohamad Salleh di sini, hari ini.

KUALA LUMPUR 30 Mei - Seorang pembantu tadbir di Kementerian Pertahanan mengaku tidak bersalah di Mahkamah Sesyen di sini hari ini atas tujuh tuduhan mengemukakan tuntutan pembelian ubat-ubatan palsu berjumlah hampir RM11,000, empat tahun lalu.

Mengikut kesemua pertuduhan, Siti Nor Hakiki Abdullah, 38, didakwa memperdayakan seorang penolong pegawai tadbir, Siti Kartika Sari Mohamad Salleh, dengan tujuh borang permohonan perbelanjaan kemudahan perubatan yang mengandungi butiran palsu.

Tuntutan pembayaran itu didakwa melibatkan pembelian ubat jenis Oxynorm, Celecoxib, Pregbalin dan Lyrica itu dilakukan di AA Pharmacy Bargain Base Sdn. Bhd., melalui tujuh keping resit berjumlah RM10,979 sedangkan ubat-ubatan itu tidak pernah dibeli.

Kesemua perbuatan itu didakwa dilakukan di pejabat Markas Logistik Udara, Pangkalan Udara Kementerian Pertahanan di sini antara 12 Ogos 2013 dan 31 Oktober 2013.

Pendakwaan dikemukakan mengikut Seksyen 18 Akta Suruhanjaya Pencegahan Rasuah Malaysia (SPRM) 2009 dan boleh dihukum di bawah Seksyen 24(2) akta sama yang memperuntukkan hukuman penjara maksimum 20 tahun dan denda tidak lebih lima kali jumlah suapan atau RM10,000, manapun yang lebih tinggi.

Hakim Alladeen Ismail membenarkan tertuduh yang tidak diwakili peguam itu diikat jamin RM6,000 dengan seorang penjamin bagi kesemua pertuduhan selain memerintahkan tertuduh menyerahkan pasport kepada mahkamah. Sebutan kes berkenaan ditetapkan pada 26 Julai ini.

31 Mei 2017

15. Suspek ke-13 dibebas tahanan reman

PUTRAJAYA 31 Mei - Suspek ke-13 yang direman untuk membantu siasatan berhubung kes menerima rasuah bagi melindungi pusat judi haram dan rumah urut di sekitar Melaka dibebaskan oleh Mahkamah Majistret di sini hari ini.

Perintah itu dikeluarkan oleh Majistret Nik Isfahanie Tasnim Wan Ab. Rahman terhadap suspek tersebut dengan jaminan Suruhanjaya Pencegahan Rasuah Malaysia (SPRM).

Pegawai polis berpangkat Asisten Superintenden (ASP) itu sebelum ini direman tujuh hari sejak 25 Mei lalu.

Pegawai polis berusia 51 tahun yang memegang jawatan Ketua Bahagian Siasatan Jenayah Ibu pejabat Polis Daerah (IPD) Alor Gajah berkenaan direman bagi membantu siasatan SPRM mengikut Seksyen 16(a)(B) dan 17(a) Akta SPRM 2009.

Selain itu, mahkamah sama juga membenarkan permohonan SPRM untuk menyambung tempoh reman selama dua hari bermula esok terhadap tiga orang awam berhubung kes sama.

Mereka sebelum ini telah dibebaskan daripada tahanan reman di bawah Akta SPRM 2009 pada 28 Mei lalu, namun ditahan semula mengikut Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLA) 2001 sehari kemudian.

Ketiga-tiga suspek itu direman di bawah AMLA 2001 selama empat hari bermula 29

31 Mei 2017

16. Rasuah: Dua penguat kuasa KPDNKK Perak direman



DUA penguatkuasa Kementerian Perdagangan Dalam Negeri, Koperasi dan Kepenggunaan (KPDNKK) Perak hari ini direman lima hari bagi membantu siasatan Suruhanjaya Pencegahan Rasuah Malaysia (SPRM) berhubung kesalahan meminta dan menerima rasuah membabitkan wang RM8,000, semalam ketika dibawa ke Mahkamah Majistret disini hari ini.

IPOH 31 Mei - Dua penguat kuasa Kementerian Perdagangan Dalam Negeri, Koperasi dan Kepenggunaan (KPDNKK) Perak hari ini direman lima hari bagi membantu siasatan Suruhanjaya Pencegahan Rasuah Malaysia (SPRM) berhubung kesalahan meminta dan menerima rasuah membabitkan wang RM8,000.

Majistret Siti Hanum Mohamad Sah membenarkan kedua-dua lelaki berusia 34 dan 35 tahun itu direman mulai hari ini sehingga 4 Jun mengikut Seksyen 117 Kanun Tatacara Jenayah.

Terdahulu, kedua-dua lelaki terlibat dibawa ke Mahkamah Majistret di sini kira-kira pukul 10 pagi dalam keadaan bergari dan memakai pakaian lokap berwarna jingga dan keluar kira-kira dua jam kemudian.

Difahamkan, kedua-dua individu tersebut ditahan oleh SPRM pada kira-kira pukul 10.45 malam semalam semasa menerima wang tersebut di Dataran Majlis Bandaraya Ipoh (MBI) di sini.

Wang rasuah tersebut dikatakan diterima daripada seorang peniaga berusia 44 tahun sebagai balasan menutup kes yang berlaku pada tahun 2014 bagi kesalahan menjual arak tiruan di dua buah permis di sini. -

31 Mei 2017

17. Penolong pengurus akhbar Inggeris direman



PENOLONG pengurus sebuah akhbar bahasa Inggeris dibawa ke Mahkamah Majistret Putrajaya berhubung kes meminta wang suapan RM70,000

PUTRAJAYA 31 Mei - Seorang penolong pengurus akhbar bahasa Inggeris direman selama enam hari bagi membantu siasatan berhubung kes meminta dan menerima wang suapan berjumlah RM70,000.

Mahkamah Majistret di sini hari ini membenarkan permohonan Suruhanjaya Pencegahan Rasuah Malaysia (SPRM) untuk menahan suspek berkenaan bermula hari ini sehingga 5 Jun.

Majistret Nik Isfahanie Tasnim Wan Ab. Rahman membenarkan lelaki itu disiasat mengikut Seksyen 16(a)(B) Akta SPRM 2009 kerana disyaki menerima wang rasuah.

Menurut kenyataan SPRM, pihaknya telah menahan seorang lelaki kerana disyaki telah meminta dan menerima wang suapan kononnya untuk menutup kes yang disiasat agensi itu.

Suspek berusia 54 tahun itu difahamkan telah meminta RM70,000 daripada seorang kenamaan yang sedang disiasat oleh SPRM untuk menutup fail kes melibatkannya.

Pengadu telah ditahan di sebuah hotel di Kuala Lumpur bersama wang tunai kira-kira RM20,000 lebih kurang jam 9.30 malam semalam.

Difahamkan, suspek yang bekerja di sebuah agensi media akan memberitahu pengadu bahawa dia mempunyai kenalan di SPRM dan mampu menyelesaikan kes melibatkannya yang disiasat oleh agensi itu.

31 Mei 2017

18. Tindakan tegas akan diambil terhadap doktor salah guna profesion - Dr Hilmi

PENGERUSI Tabung Haji, Datuk Seri Abdul Azeez Abdul Rahim (kanan) bersama Datuk Seri Hilmi Yahaya menyampaikan wang tunai kepada golongan sasar pada Program Ziarah Kasih Ramadan 2017 anjuran Yayasan Tabung Haji dan Biro Keahlian & Daftar Pemilih di Balik Pulau, Pulau Pinang dekat sini hari ini.

BALIK PULAU 31 Mei - Kementerian Kesihatan memandang serius isu lima doktor yang didakwa menyalahguna profesion mereka untuk memperdaya Jabatan Pengangkutan Jalan (JPJ) berkaitan pemeriksaan kesihatan beberapa individu untuk memperbaharui Lesen Pengangkutan Kenderaan Awam (PSV).

Timbalan menterinya, Datuk Seri Dr Hilmi Yahaya berkata, tindakan tegas akan diambil terhadap mereka jika didapati bersalah.

"Kita boleh ambil tindakan tegas kepada mereka yang langgar peraturan kita. Kalau ada kes macam ni kita akan ambil tindakan tegas. Setakat ini mereka belum didapati bersalah. Kita akan tentukan (tindakan) kemudian," katanya kepada pemberita selepas menyampaikan sumbangan Program Ziarah Kasih Ramadan 2017 berjumlah RM300,000 kepada 1,500 penerima di sini, hari ini.

Semalam, lima doktor dan dua lelaki yang bertindak sebagai "runner" dihadapkan di Mahkamah Sesyen George Town, Butterworth dan Ipoh atas tuduhan memperdayakan JPJ berkaitan pemeriksaan kesihatan beberapa individu untuk memperbaharui lesen PSV, Februari lepas.